

Naqqiut

Siusinnerusukkut 23. august 2021-mi nassiunneqarsimasumut taartaasoq.
(*Naalackersuisup taaguutaa allanngortinneqarpoq naalackersuisoqarfiit allanngortinneqarnerisa kingunerisaanik*)

Matumuuna Inatsisartut suleriaasianni § 33 najoqqutaralugu aalajangiiffisassatut siunnersuummik matuminnga Naalackersuisut saqqummiussaqrput.

Ingerlatsiviit pillugit inatsisip allanngortinneqarnera pillugu inatsisini assigiinngitsuni aalajangersakkat ilaasa kunngip peqqussutaatigut Kalaallit Nunaannut atuutsilernissaat pillugu Namminersorlutik Oqartussat akuersissuteqarnissaat pillugu Inatsisartut aalajangiiffisassaattut siunnersuut (Piginnittuiit pillugit malittarisassiat atuutsilerneru aalajangersakkallu attuumassutillit nutarsarneri)

(Inuussutissarsiornermut Niuernermullu Naalackersuisoq)

Aalajangiiffisassatut siunnersuutip imarisai

Kalaallit Nunaanni piginnittuiit pillugit malittarisassianik naammassisaqarniartutut inuussutissarsiorfinnut tunngatitatut inatsisaasunik annertunerusumik nutarsaanermi peqqussutit ilaapput. Piginnittuiit imaluunniit timalittut inuit tassaapput naggataagut toqqaannartumik imaluunniit toqqaannartuunngitsumik piginnittutut pigisanik imaluunniit taasisinnaatitaanermik pisinnaatitaaffinnik naammattumik pigisaqarnermikkut suliffimmik piginnittuusut imaluunniit aqutsisuusut, allatulluunniit periusaasut ikiorsiullugit aqutsisuusut.

Piginnittuiit pillugit malittarisassianik atuutsitsilernikkut suliffeqarfinnik piginnittoqarnerup ilusaanik annertunerusumik paasinnissinnaasoqalissaaq. Taamaattumik siunissami ingerlatseqatigiiffiit ilusilersugaaneri paasiuminaatsut aqqutigalugit suliffimmik piginnittuunerup takujuminaallisarnera ajornarnerulissaaq, aammalu nunani akileraarutigisassanik toqqorteriffinni aningaasaatinik toqqortaqtarnissamik akiuissapput.

Aalajangersakkat nutaat ingerlatseqatigiiffinnik suliassaqarfimmi piginnittuinnik nalunaarsuisarneq pillugu piumasaqaatit eqqunnerisigut nukittorsakkatut aqutsineq aqqutigalugu akileraarnermik pisortat aningaasatigut peqquserlunnermut piaarnerusumik toqqartuinerusumillu iliuuseqartitsisinnaassapput.

Taamaalisukkut aningaasaleriffimmi pinerluttoqarnermut atatillugu ujaasisinnaanermut periarfissat pitsanngorsaavigineqassapput, aammalu pinerlunnikkut pissarsianik malunnarunnaarsaanermik aamma qunutitsilluni anguniaqarnermik aningaasaliinermik pinaveersaartitseqataassallutik.

Suliffeqarfinni piginnittuinnik nalunaarsuisussani ilaapput:

- Ingerlatseqatigiiffiit, suliffeqarfiit aamma aningaasaateqarfiit (aktianik piginneqatigiiffiit (aktieselskabit), inuussutissarsiutinik ingerlatsisutut aningaasaateqarfiit, anpartsselskabit il.il.).
- Aningaasaliisartutut suliffeqarfiit (aningaaseriviit, taarsigassarsisitsiniartarfiit (realkreditinstitutit), sillimmasiisarfiit (forsikringsselskaber) il.il.)
- Inuussutissarsiutinik ingerlatsisuunngitsutut aningaasaateqarfiit (aningaasaateqarfiit inatsisitigut pilersitat, legatit, suliffeqarfiit imminnut ingerlatittut, il.il.
- Peqatigiiffiit aalajangersimasut (sulisitsisut peqatigiiffii, sulisartut peqatigiiffii kattuffiillu assingusut allat il.il.).

Ingerlatseqatigiiffinnut inatsisitigut suliassa qarfinni Danmarkimi aamma Kalaallit Nunaanni inatsisaasut ilarujussui nunat tamalaani inatsisaasunik, ilanngullugillu minnerunngitsumik EU-mi malittarisassianik tunngaveqartinneqarput.

Aktiaatillit kinaassusersinissaat, paasissutissat ingerlateqqittarneri, aamma aktiaatillit pisinnaatitaaffiinik ingerlatsisarnerup oqisarnissaa pillugit EU-mi malittarisassiat piviusunngortinnissaat pillugit Folketingip Kalaallit Nunaannut inatsisissatut siunnersuummik akuersissuteqarnissaanik Namminersorlutik Oqartussat akuersissuteqarnissaat pillugu ataatsimiinnermi matumani aalajangiiffigisassatut siunnersuummik Naalakkersuisut saqqummiussaqaarsimapput. Kalaallit Nunaanni piginnittuut pillugit malittarisassianik eqqussiniarluni inatsisini katersaasuni tamarmiusuni inatsisissatut siunnersuummik piviusunngortitsineq ilaavoq.

Taamaalisukkut oqaluuserisassani UKA2021/125/126 aamma 127-ni kunngip peqqussutaatigut Kalaallit Nunaannut atuutsitsilersutut inuussutissarsiutigalugu aningaasaateqarfiit pillugit inatsisip allannortinnissaa, sulliviit inuussutissarsiutitut ingerlatat ilaat pillugit inatsisip allannortinnissaa, aamma aningaasaateqarfiit aamma peqatigiiffiit ilaat pillugit inatsisip allannortinnissaa pillugit Namminersorlutik Oqartussat inatsisinik assigiinngitsunik akuersissuteqarnissaat pillugu Inatsisartut aalajangiiffigisassaattut siunnersuutinik Naalakkersuisut saqqummiussiniarput.

OECD-mik Kalaallit Nunaata attaveqarnerata malitsigisaanik akileraartarnermik oqartussaqaarfiit akornanni paasissutissanik paarlaateqatigiittarnermik suleqatigiiffimmi Financial Action Task Force on Money Laundering’imi (FATF-imi) aamma Global Forum’imi pinerlunnikkut pissarsianik malunnaarunnaarsaanermik akileraarutinillu akiliinissamik pinngitsuuniartarnermik akiuisarneq pillugu suleqatigiinnermi peqataanerup

malitsigisanik nunat tamalaani pisussaaffigisanik Kalaallit Nunaata malittarinnissinnaanissaanik inatsisit katersat piviusunngortinneri qularnaariniarput.

Inatsisaasut atuuttut

Piginnittuinnik inatsisitigut siusinnerusumi inatsisilersuisoqarsimanngilaq.

Siunnersuummi pingaarnertitat

Ingerlatseqatigiiffinnut inatsimmut peqqussut piginnittuiit pillugit malittarisassiat atuutsilerpai. Aammattaaq ingerlatseqatigiiffinnut inatsimmut peqqussummiipput malittarisassianut makkununga tunngasutut nutarsaanerit; ingerlatseqatigiiffiup aningaasaatai, aallartisaasutut ingerlatseqatigiiffiit, aningaasaatinik piginnittut taarsigassarsiaat, akissarsisitsisarnernut politikkit, qanigisatut illua'tungerisallu aningaasanik ingerlaartitsinerlik takunnissinnaassuseq akuerinnittarnerlu, kukkunerisuisartumik toqqaaneq soraarsitsinerlu, A/S-inngortillugit suliffeqarfinnik killilimmik akisussaaffilinnik (V.M.B.A.-nik) allangortitsinerit, inunmut paasissutissanik illersuinerit, piginnittuiit, aamma nakkutilliinissamut katersaatit. IVS-iliornissamut periarfissaq atorunnaarpoq, taamaalisukkulli anpartsselskabinut aningaasaateqarnissamik piunasaqaat 50.000 kr.-nit 40.000 kr.-nut appartinneqarpoq. Peqqussutip imarisai pillugit itisiliisutut paasissutissanut uteqqiineq innersuutigineqarpoq.

Pisortanut aningaasaqarnikkut allaffissornikkullu kingunerisinnaasat

Aalajangiiffigisassatut siunnersuutip pisortani oqartussaasoqarfiit sunniivigissavai, ingammilli nunani allani akileraartarnermut pisortanik akileraartarnermut pisortat suleqatiginninnerat nukittorsarneqassaaq.

Namminersortutut inuussutissarsiorfimmut aningaasaqarnikkut allaffissornikkullu kingunerisinnaasat

Nalunaaruteqartarnissamut annertusisatut piunasaqaateqarnikkut inuussutissarsiorfimmut aalajangiiffigisassatut siunnersuut aalajangersimasunik aningaasaqarnikkut allaffissornikkullu kingunerisassaqaassaaq. Ingerlatseqatigiiffinnut inatsimmi malittarisassiat nutarsarnerisa nassatarissavaat ingerlatseqatigiiffinnut inatsisitigut malittarisassiat Danmarkimi atuuttunut tunngatillugit assigiiarnerulissanerat, taamaalillutillu nunanit allanit aningaasaliisartunut ilisarnarnerulissapput.

Innuttaasunut aningaasaqarnikkut allaffissornikkullu kingunerisinnaasat

Soqanngilaq.

Tusarniaaneq

Aalajangiiffigisassatut siunnersuummi ilaasutut inatsisinik assigiinngitsunik taakkuninnga Kalaallit Nunaannut atuutsitsilernissat pillugit peqqussutinut allaqqaakkat piffissami 1. juuli 2021-mit 30. juuli 2021 tikillugu ilanngullugulu tamanut ammasumik tusarniaassutinut

nittartakkami tusarniaassutaasimapput, kiisalu tusarniaasarfittut illua'tungerisanut attuumassutilinnut nassiunneqarsimallutik, takuuk tusarniaanermut allakkiaq.

Ilanngussat

Ilanngussaq 1: Ingerlatseqatigiiffinnut inatsimmut peqqussummut allaqqaagaq

Ilanngussaq 2: Ingerlatseqatigiiffinnut inatsimmut peqqussummik eqikkaaneq

Ilanngussaq 3: Tusarniaanermut allakkiaq